

Von Galeen.

mit köstlichen Tapfferereyen von Goldt Silber vnd Seiden
behengt vnd geziert gewesen.

Item den vierundzwenzigsten May hat man angefangen
die Galeen vnd Schiff klein vnd groß auß dem Arcenal inn
die Donaw zuführen.

Großlichen ain gewaltige grosse Galee / Columbine ge-
nant / welche auff jeder seitten innwendig gehabt hat / Neun-
zehn benckh zum Rudern / thut zu beyden achtunddreyßig
benckh / vnd waren zu jeder banckh verordent zwo Person
die da haben Rudern müssen / Summa Sechsvndszibenzig Per-
sonen / Weiter sein auff dem Grämbsen / oder vorderthail des
Schiffs gestanden sibenzehen grosse vnd klaine stuck / Vnd in der
mitte oder cruschia drey schöne stuck / vnd in dem hindern
grämbsen / oder hinderthail der Galeen vier stuck / auff den Mast
oder Seglbaumen aber / so inn mitten der Galeen auffgericht
gewesen / sein gesteckt zween schön / groß / Roth Damascat
fannen / Dise Galeen ist auch mit souil schönen Segln vnd menig
der fannen / von Damascat vnd Taffat / Roth vnd weis / klai-
ner vnd grosser / sambt aller zuegehörung vnd noturfft / Auch
mit aller Munition vnd noturfft zu ainem statlichen angrif der-
massen versehen worden / als wann man sie gleich wider den
Feindt schickhen vnd brauchen wolt / Dann sy nit allain wie ver-
melt mit Büchsn / fannen woll gestaffiert erschienen / Sonder
auch herlich mit Hauptleuten / Leütenambt ic. Kriegs volck vnd
Wachmayster / ainigen mengel nicht gehabt.

Item darnach waren heraus gezogen zwo ander Galeen /
deren Eine genant war Sandt Paull die ander S. Joann / hat
ein jede achzehen benck auff einer seitten / sein auch nicht vill weni-
ger grosse vnd klaine stuck / vnd Büchsn auff ainer jeden disen
Galeen

Von Galeen.

III

Galeen gefunden worden / dann auff der grossen Galeen / zu dem mit leuten / Fannen vnd Munitio / auch seer wol gerüst vnd versehen gewesen / in gleichem fall wie die gross Galeen.

Item dann sechs andere klaine Schiff / genant Bergantini / deren ain thail mit zwölff vnd ain thail mit dreyzehen bencken waren / vnd auff jedem Schiff / vierzehen gross vnd klaine stuck / Auch sonst in allermasz gerüst vnd versehen / wie die andern zway Schiff / mit segln / Fannen vnd anderer notturfft.

Item darnach bracht man noch drey andere Schifflein / genant Frägates / ein jedes mit zehen bencken / vnd auff jedem Schiff drey stuck püchsn / vnd gleicher weis mit allem geschmuck / zier / Fannen / Segln vnd anderer notturfft versehen wie die andern / In Summa ohn allen mangl.

Item mer waren zugegen vier andere nidere Nassarn Schiff / deren het ein jedes zehen benck / darauff zu baiden seiten zwanzig Personen / So zum Ruedern vnd angriff dienten / vnd zu disen Schiff einem / waren verordent drey Schiffleut / die die Schiff regierten vnd neben inen fünff Befelichsleut / dise Nassarn / hat ain jedes drey Falckhenetlein / Eins vorn auff dem grämst die andern zway hinten / vñ warn auff baiden seiten lustig verdeckt mit Vngerischen Tharschen / Inn disen Schiffen waren lauter Hussarn deren ein jeder het sein Tharschen wie gehört / auff der seiten sein Copi oder langē Xenspiess mit einem Fendlein Rot vñ Weis / Ein Türckhischen Säbl / vñ einen Streitkolbē oder püchsn.

Witter ist auch dagewesen / ein Venedisch Schifflein / die man Gundula nendt / gleicherweisz wie man sy zu Venedig braucht / das auch mit einem schönen tuech von Rot vnd Weis in der mitten bedeckt gewesen ist.

Von Galeen.

Welche Schiff alle / so herrlich schön stattlich / vnd gewaltig
zuegericht / mit Fannen von Damascat vnd Taffat / Rot vnd
weisser farb / auch Haupt vnd Befelicheleut / sambt allerlay Mo-
nition versehen gewesen / wie man sy auff der Thonaw oder dem
Meer gegen dem Erbfeindt brauchen thut /

DEn achtundtzwainzigisten tag des Monats May / welche-
er gewest ist / der nechst Erichtag vor dem Pfingsten / vngener-
lich zwischen vier vnd fünff vhn nach mittag / ist mir als dem Un-
gerischen Ernholdt / durch die / des Durchleuchtigen / Hochgebor-
nen Fürsten vnd Herrn Erzhertzogen Carlen zu Osterreich zc.
in beywesen der andern meiner zwayen mitgesellen / genant die
Edlen vnd Ehnuersten Steffan Demoures / sonst Heinnault
genant / als Römischer Ehnholdt / vnd Wilhelm Büllenstrasz /
Behaimischen Ehnholdt / oberantwort worden / ein Cartell oder
verkhündung aines Turniers / mit beuelich / das ich solliche ver-
khündung von stundan soll zu Hoff verlesen vnd Publiciern / auff
dem alten klainen gang gegen dem Frauen Zimer vber / welche-
em ich sambt meinem obgedachten mitgesellen / mit aller gehorsam
nachhumen / auch als baldt in der Fürstlich: Durchleucht: Erz-
herzog Carls Ballast / welcher damals inn der Wolgebomen
Freyherm von Enzingen zc. behausung gewesen ist / versüegt vnd
dasselbs auff unsere Ross gesessen geen Hoff zureitten / da sein
vor vns her gangen / bey zehen oder zwelff Trumelschlager vnd
Pfeiffer / denen wir vber den Graben vnd Kolmarckht nach-
gefolgt / vnd gen Hoff geritten / auch als baldt auff den benen-
ten gang getretten / vnd drey mal in ordnung mit den Trumeln
nach Fren brauch auffschlagen lassen / Nach dem hab ich
zwischen meinen baiden mitgesellen die Empfangen
verkhündung des Fuss Turniers verlesen
vnd Publiciert / die also
gelauttet.

Volgt